

四庫全書

集部

欽定四庫全書

集部

東坡全集卷一百八

九

詳校官庶吉士臣謝恭銘

檢討臣何思鈞覆勘

總校官進士

臣

朱

鈴

校對官中書

臣

牛稔文

謄錄監生

臣

陳其道

欽定四庫全書

東坡全集卷一百八

宋 蘇軾 撰

外制制勅七十四首

李之純可集賢殿修撰河北都轉運使

敕乃者役錢貸息之弊民兵馬政之勞萃于北方而天
不靖民河溢為灾老幼奔走流離道路十年於此矣嗚
呼其孰為朕勞來安集使復其舊乎以爾中大夫直龍
圖閣權知滄州李之純治辦之能嘗見於用忠厚之質

不移於勢是用進秩書殿增重使指其往撫疲瘵之俗
察貪暴之吏無縱詭隨以謹無良朕將酌民言以觀汝
政可不勉歟可

呂大臨太學博士

敕具官呂大臨大學禮義之所從出也不擇人以為法
而恃法以為治可乎漢之郭泰符融唐之陽城韓愈士
皆靡然化之其賢於法遠矣朕方詔有司䟽理學政而
近侍之臣言汝可用必能於法禁之外使士有所愧而

不為乃稱朕意可

羅適知開封縣程之邵知祥符縣

敕某等赤縣之衆甚於劇郡五方豪傑之林百賈盜賊之淵蓋自平時號為難治而況市易始去逋負尚繁役法初復農民未信以爾適學行純固有卹民之心以爾之邵才力强敏無媿安之意各服乃事以觀其能不患不已知求為可知者可

杜純可刑部員外郎

敕具官杜純用法如權衡權可以輕重移而衡不可以毫髮欺故司寇之職必有守道之長貳而輔之以守官之僚屬汝昔為士師秉節不回獨持正議以直羣枉往服厥官無易汝守以不忍之心行無心之法則予汝嘉可

劉震知陳留縣

敕具官劉震縣劇而難治故有司艱於用人地近而易知故才者樂於自用臨政以簡決獄以明御史以嚴去

盜以武能此四者孰不汝知可

皇伯仲煜可贈保寧軍節度使東陽郡王

敕祖宗之德天地並隆施及子孫皆享民社勝衣有朝
請之奉闔棺有茅土之封始終之間哀榮斯極具官仲
暉寬厚寡過雍容有常生不勤於父師沒見思於姻族
既得考終之道可無追遠之恩豹尾神旗守臣之威命
金璽盤綬諸侯之寵章服我寵光以貴寔可

杜紘可右司郎中

勅具官杜紘士一歷都司即踐清要非一時名勝不在此選爾以文無害而宿其業往服乃事益茂厥德以稱朕命可

皇城使裴景知慈州莊宅副使郭逢知階州西

京左藏庫副使王克詢知順安軍

敕具官某等朕銓擇將吏視其才力彊敏可任以事者必試之治民苟不知愛民奉法馭吏而戢士雖智勇有聞朕無取焉爾等皆以考績察廉號稱明練薦者交章

故在此選往服厥官無失朕命可依

云

云

借職楊晟該

差使

吳奉雲等各轉一官

敕某等向敕邊臣增葺城堡所以護安民夷各全其生
爾能相率獻田出力有足嘉者服我爵秩永保忠順可

呂大忠可發運副使

敕具官呂大忠發運使按治六路所部幾萬里持節出
使未有若此其重者也以爾更練世故果於從政屢試
劇部厥聲藹然是以命爾均南北之有無權貨幣之輕

重使農末俱利公私宜之以稱朕意可

蔣之奇可集賢殿脩撰知廣州

敕具官蔣之奇按治嶺海統制南極聲教所暨聳聞風
采自唐以來不輕付予朕既擇其人復寵以秘殿之職
使民夷縱觀知其輟自禁嚴以見朝廷重遠之意其於
服從畏信豈不有助也哉可

吳安持知蘇州劉珵知滑州

敕具官某等兩河之俗朴其弊也悍而輕犯法三吳之

俗巧其弊也流而不知止惟君子為能去其已甚濟其所不及故所居而民安之朕求二郡守訪之左右咸曰汝宜往朕朕訓因俗而治可依

云云

謝卿材可陝西轉運使

敕具官謝卿材治邊者不計財惟邊之所用治財者不卹民惟財之為富此古今之通患也朕知汝才知可倚忠厚可信故以西方之政責成於汝往與帥守者謀之惟適厥中以民為本可

李曼知果州

敕具官李曼蜀之人治蜀知其好惡察其情偽宜若易
然又況於寬而明和而毅如汝曼者乎乃者無實之訴
朕既察之矣乘傳西歸平賦役省條教以慰父老之望
可

黎珣知南雄州

敕具官黎珣嶺海之遠吏輕為姦非良守令民無所赴
告往祇厥官如在近甸則予汝嘉可

張赴再任乾寧軍

敕具官張赴使者言汝為政有方民甚宜之當解而留
以慰民望可不勉哉可

皇伯仲嬰可贈泰國軍節度使追封申國公

敕祖宗之意仁孝為先孝故專篤於親仁故閔勞以事
雖豐功盛烈不見於宗室而令名美實克全於始終死
喪之戚哀歎何及具官仲嬰少而簡素輔以溫文既克
已以歸仁亦樂善而忘勢信順多助蓋大有上吉之祥

金史卷一百八
高明令終真既醉太平之福建元戎之六纛錫上公之
九章維以勸忠豈云虛授庶幾幽壤服我寵靈可

林郡開封推官

敕具官林郡天府之劇古稱難治非兼人之資有不能
濟今自逋負逃亡悉歸之四廂宜若易辦然夫辦之易
則責之詳爾材敏素聞而以舉用往助乃長使治衆如
治寡以稱所舉可

鄧義叔可主客郎中王諤可水部郎中

敕具官某等吏惡數易而事有不得已者通商惠農水
政為急而招携柔遠賓客之事亦重矣各祇乃事為安
官樂職之計可依云

王荀龍知棣州

敕具官王荀龍平原厭次沃野千里桑麻之富衣被天
下宜得老成循吏以輔安良民式遏姦慝訪之左右咸
曰汝宜往悉乃心朕將觀焉可

黃憲章獲賊可承事郎

金史卷一百八
敕具官黃憲章勞能之賞不計日月爵祿之報必視首
功宜從遷秩之勞以勸追胥之勇可

御史中丞劉摯可兼侍讀

敕孟子有言君仁莫不仁君義莫不義一正君而天下
定矣朕惟臺諫言責之臣雖知無不言常救之於已失
而勸講進讀之士蓋朝夕納誨故日化而不知合於孟
子正君之義非獨有司之事也具官劉摯以道事君非
法不言使朕日聞所不聞天下稱焉宜因古今冊書之

成文取其興壞治忽之要論言之於無事救之於未失
使朕立於無過之地豈非汝爭臣之大願乎可

處士王臨可試太學錄

敕具官王臨觀近臣以其所為主觀遠臣以其所主朕
初不汝知也而光論汝可用其試之太學汝勉之矣朕
既因光以知汝亦將考汝所為而觀光焉可

皇叔克眷可贈曹州觀察使追封濟陰侯

敕先王建邦啓土必先宗盟上自魯衛下至應韓側室

之子莫不南面國家自仁率親專於教愛故生無吏責而富以祿沒享隆名而告諸幽忠恕之道可謂備矣具官克菴以茂美之質服信厚之化雖功名才業不見於用而恭儉孝悌刑于厥官命以廉車即俟其地皆國之舊非朕敢私庶幾有知服我休命可

寇彥卿彥明左班殿直

以兄殿直寇彥古永樂成死事

敕具官寇彥卿士不惜以身殉國朕獨何愛一官不以收恤其家乎祇服朕命毋忘死者可

駙馬都尉張敦禮可節度觀察留後

敕軒冕之來德量為稱外無充詘之容可以觀德內若
固有之安可以言量具官張敦禮少以經術秀於士林
雖緣姻戚之選不失儒素之行日奉朝請既抱才而未
試坐閱歲月亦久次而當遷進居兩使之間增重諸情
之遇益礪士節以為國華可

內人張氏可特封典贊

敕張氏朕幼學之初未就外傳命爾執業以待左右勤

勞有年恭謹寡過進掌儀範以旌徽柔可

故尚宮趙氏可特贈郡君

敕趙氏先朝差擇女士以輔陰教侍御左右罔匪淑人矧茲六尚之選必備四教之法奄焉淪喪宜極哀榮以爾名族之英掖廷之舊行應圖史言中物則彤管有煒既傳好德之芳象服是宜無愧飾終之典庶幾幽壤服我寵章可

馮宗道可右驥驥使內侍省內侍押班梁惟簡

可文思副使內侍省內侍押班

敕具官某等爵祿天下之公器也朕不敢以私暱之愛而輕用其賞亦不敢以近習之嫌而不錄其功以爾等小心忠孝逮事列聖出入中外劬勞百為而宗道以藩邸攀附之勤惟簡以東朝奉事之久各還所寄加重其任益勵素丹以稱異恩可依

云

云

梁從吉可遙郡團練使入內內侍省副都知

敕祖宗之化自家刑國故雖左右近習之臣莫不好善

而知義彬彬然有士君子之風焉具官梁從吉莊重有
守溫良寡過給事宮省知無不為服勤邊徼克有成績
改錫戎團之命進助內宰之政益勵素守以稱異恩可

劉有方可內侍省右班副都知

敕祖宗之化自家刑國故雖左右近習之臣莫不好善
而知義彬彬然有士君子之風焉具官劉有方溫恭和
毅勤強練密進從王事以法令為師退安私室以圖史
為樂進領右璫之貳益親中禁之嚴惟忠與敬乃稱朕

命可

翟思知泉州周之純知秀州沈季長知南康軍
敕具官某等朕惟四海之廣一夫不獲足以害教化之
成傷陰陽之和故選建守長必以學士大夫為先孔子
曰君子學道則愛人小人學道則易使也爾等皆以儒
術進有聞于時矣其深識朕意徃行所聞欽哉可

馬傳正大理寺主簿

敕具官馬傳正哀敬折獄明啓刑書理官之任也主簿

雖卑亦有事於其間矣爾以選用其勉服此言可

張之諫權知涇州康識權發遣鄜州

敕具官某等邊郡之政兵食為先郡守之責文武兼綜
以爾等才力之選卓然有聞治辦之效見于已試朕雖
招携來遠不求邊功爾當積穀訓兵常若寇至祇率厥
服往惟欽哉可依云

梁誥可供備庫副使轉出

敕具官梁誥奉事之久累勞當陞求從外遷亦各其志

進貳諸使往齒外朝益務廉平以答休寵可

燕若古知渝州

敕具官燕若古汝向以才選奉使東方官省而歸因以得郡蓋可謂異恩矣巴峽之嶮邑居褊陋負山臨谷以爭尋常獨渝為大州水土和易商農會通賦役爭訟甲於旁近毋以僻遠鄙夷其民欽哉可

刪定官孫諤鮑朝賓並宣議郎

敕具官某等廷見乃官法之所嚴也歲月之課保任之

數差若銖黍輒不得遷今於汝獨畧之者豈非以制法定令汝與其議故與祇服朕命以法自律無徒知之可

王振可大理少卿

敕具官王振任法而不任人則法有不通無以盡萬變之情任人而不任法則人各有意無以定一成之論朕虛心以聽人法兼用以爾出入中外敏於從政詳平奏讞審於用律廷尉之事爾惟副之夫法出於禮本於仁成於義勉思古人以稱朕命可

李籲可宣德郎

敕具官李籲朕有大政令使近臣總領其議民之休戚
國之治亂成於其手可謂重任矣爾以儒術進以邑政
選而為之官屬亦豈輕哉二三臣者言爾當遷其服朕
命益祇乃事可

趙思明可西上閣門副使

敕具官趙思明國之宗臣義同休戚故文終之後配漢
並隆而梁公之孫與唐無極國家佐命元老獨高韓王

銘勲太常侑食清廟爰自近歲數其中微乃眷裔孫尚有遺烈宜因近侍之請進陞上閤之貳勉蹈祖武副朕懷人追遠之心可

李承祐可內殿崇班

內臣轉出

敕具官李承祐奉事茲久累勞當遷遂齒外朝縉紳之列益思忠藎毋忝恩榮可

蕭士元知隰州趙永寧知永靜軍

敕具官某等文武異用而其道同軍國異容而其情一

爾以才選往莅厥服惟少私寡欲則民自靖惟奉法循
理則吏自畏祇率朕訓欽哉可

黃光瑞可內殿崇班

敕黃光瑞朕覆養華夷義均臣子慎重爵賞必加有功
以爾昔助王師遠獲逋寇歷年滋久宜示異恩服我寵
休永思忠藎可

文貽慶可都官員外郎居中可宗正寺主簿

敕具官某等昔江左二老王導謝安唐之元勳汾陽西

平皆以積德流慶子孫昌衍布列臺省為邦之光今吾
太師氏亦庶幾焉爾等才行之美所資者深聞見之廣
不扶自直宜近而遠未稱朕意其歸服乃事同寅協恭
以究事君親之義可

皇兄令夬可贈博州防禦使博平侯

敕爵齒之貴並隆於朝廷死喪之威莫先於兄弟禮有
哀卹義兼哀榮故具官令夬端厚有常靖恭寡過生不
勤於保傅沒見思於族姻宜分竹符就賜茅社服予惇

叙之寵慰爾永歸之魂可

高士永知文州

敕具官高士永自將為守非藝而果不在此選治兵欲
嚴御吏欲明撫民欲寬守邊欲信汝勉之矣毋廢朕命
可

太皇太后再從弟高士縝高士淦可並左班殿
直文思副使梁惟簡可皇城副使

敕具官某等朕惟坤元成物之恩雖以天下養無足稱

其德者故推餘澤以及葭莩之親左右奉事之臣雖天地之施無所報塞尚勉忠孝以答萬一可

范百祿刑部侍郎

敕朕哀敬五刑期協中道酷者志於殺惟殺之務則深刻而失情恕者志於生惟生之知則玩刑而廢法朕欲情法兩得生殺必中非俗吏之所能思古人而永歎爰試以事乃得其人具官范百祿少以異材輔之篤學昔奉大對有守禮憂國之言旋為爭臣有責難愛君之意

必能參用經術折中人情民自以為不冤汝當務致此者必也使無訟朕亦將庶幾焉可

朱光庭可左司諫王覲可右司諫

敕具官某等惟善人能受盡言故昔之諫者常有不容之憂然有志之士猶且不顧忠義所激憂患可忘今朕恭己無為虛心以聽汝等所論蓋無虛日朕亦有拒而不聽聽而不用者乎各服新命盡所欲言言而不從朕則有愧知而不言汝亦負朕可不勉哉可

鮮于侁可左諫議大夫梁燾可右諫議大夫

敕仲虺言湯之德曰改過不吝孔子論一言而喪邦曰
惟予言而莫予違嗚呼天下之治亂安危有不出於此
者乎朕夙興夜寐思聞其過厥愆曰朕之愆不啻不敢
含怒而況於左右輔弼之臣歟具官鮮于侁邦之老成
久試于外金石之節皓首不衰具官梁燾出入館殿蓋
二十年守道篤志無所阿附皆吾爭臣之選也朕之於
事無必無我可則行之否則更之使天下曉然知朕樂

聞其過書之史冊足為美談若乃進則詭詞退則焚草
哀世之事朕無取焉可

王巖叟可侍御史

敕具官某爾以御史論事稱職擢居諫垣而能秉心不
回忠言屢聞考其所爭之義皆有可行之實予維寵嘉
之茲復命爾往貳執法樂於從善朕志亦可見矣易曰
大君有命開國承家小人勿用必亂邦也爾謹視中外
毋縱詭隨以成我純一之政可

錢勰可給事中

敕朝廷之政根本於中書而樞機於門下出入考慎然後布之天下一成而不反後世有述焉雖用人惟均而至於封駁之任其選尤甚具官錢勰文學議論世其先人典章憲度博通前世詞命之富多而愈工風力之憂煩而不亂其服新命益修厥官使為改者難於造令而承流者無所議法則惟汝賢可

明堂執政加恩

門下侍郎韓維

敕朕於訪落之初躬總章之祀追嚴烈考以脩上帝七
政軌道四海來格禮樂具舉天人並應非余一二大臣
同德比義燮和神民何以致此哉具官韓維全德雅量
外為師表忠言嘉謀入告帷幄望其容貌足以知朝廷
之尊聞其風采足以立貪懦之志艱難之際垂拱仰成
宜修舊典之常均被慶成之澤同底于道朕有賴焉

中書侍郎張璪

敕親祠合宮昭事上帝明發不寐惕然有懷永惟神考
之烈高出百王之表選建群辟遺我後人濟于艱難克
有成績具官張璪碩材不器俊德自明衛上之忠惓款
四世應務之敏勤勞百為迨茲配饗之成宜均慈嘏之
福服我明命永肩一心

尚書左丞李清臣

敕祇奉嚴禋肆行大賚誠通幽顯澤被中外六成之樂
上格於穹壤四簋之黍下浹於輝庖矧余元臣相成釐

事神人所保霈澤宜先具官李清臣德配先民才高當
世早以天人之學發為經緯之文左右先朝克有成績
屬余訪落之始共濟艱難之中迨茲慶成均被慈告宜
疏井邑之賜以示臣工之榮永孚于休以稱朕意

知樞密院事安燾

敕於皇烈考屬余大器夙夜祇懼若涉冰淵乃者饗帝
合官風雨時若肆青象魏謳歌聿歸惟天人之應萃于
眇躬蓋左右之助實賴將相具官安燾奮自儒術為時

名臣燮和兵戎無傷財害民之警持守法度有送往事
居之忠迨茲慶成均被慈告井邑之賜國有舊章與民
同休居寵無愧

同知樞密院事范純仁

敕朕出款真室還祀合宮祇見昊天陟配文考禮樂具
舉華夷駿奔方恭默無言之中繫辟公顯相之賴率禮
弗越肆予汝嘉具宮范純仁慶厯名臣之家熙寧正諫
之士著績西鄙授任中樞謨猷靖深兵革消伏領使奉

祠之日助成大事之勤降福孔多推恩宜廣矧茲宥密之地可無勲邑之加往服寵章益敬毋怠

尚書右丞呂大防

敕朕有事總章升侑神考四輔在位百工在廷禮假無言各率乃職迨此釐事之畢匪我沖人之能思與羣公均受帝祉具官呂大防擢自英祖休有直聲被遇裕陵益彰忠力入總文章之轄手疏盤錯之煩六事所瞻倚以為重三府之議於焉取平宜加勲伐之隆益增井賦

之衍服我休命思勉厥終

韓忠彥黃履並特轉朝請郎

敕考績之法三代共由雖余左右之信臣猶以歲月而
叙進率循其舊示不爾私具官韓忠彥頽然異材奮以
儒術典朕三禮識古人之大全歷事四朝有宗臣之餘
烈黃履受材宏深秉德純固入踐臺省休
有老成之風出更蒲垣遂無東顧之念祇服新命益
修厥官尚勵有為之心以需不次之舉可

皇叔祖克愛皇叔仲虢並遙郡團練使

敕朕不以親廢法亦不以義掩恩故宗室之英雖不任
事而歲月之考必付有司以爾具官克愛篤行有常率
履如一以爾具官仲號居寵而戒好德不回既累日以
當遷非無名而虛授益務忠敬以保厥家可

王獻可洛苑使

敕具官王獻傳不云乎詩書義之府禮樂德之則禦侮
扞城亦儒者之事也汝以詞學進而以武幹聞肆予虎
臣謂汝可用往服新命以成汝志可

陳次升可淮南提刑

敕具官陳次升春秋書無麥禾蓋病之也今吾淮甸之民夏旱秋水望熟於來歲譬如負重涉遠未知所舍朕甚憂之汝自百里長以才能選為朕耳目其往按視省刑獄均力役督盜賊去姦吏使民忘其災以稱朕意可
杜純可大理少卿

敕具官杜純治獄得其道仁及幽顯澤流子孫苟非其人災及草木身任其禍朕敬而畏之久難其人以爾用

法平直守道純固不以進退榮辱抑揚其心故在此選
靡不有初終之實難可不勉哉可

郭駿可開封府司錄參軍

敕具官郭駿汝昔為獄官不撓于執事以陷無辜之人
坐失厥職秉義不回有足嘉者往隸天府總攝羣掾毋
易汝守朕將觀焉可

林希可中書舍人

敕文章之變與時盛衰譬如八音可以觀政而況誥命

之出學者所師號令以之重輕風俗因而厚薄本朝革
五代積衰之氣繼兩漢爾雅之文而大道中微異端所汨
欲復祖宗之舊必以訓詞為先故難其人不以輕授具
官林希博問強識篤學力行綽有建安之風流逮聞正
始之議論徑踐外制為朝廷常潤色其精微期配昔人
使天下識典刑之髣髴務究所學朕將觀焉可

司馬光左僕射追封溫國公制

救執德不回用安社稷為悅以死勤事坐致股肱或虧

方予訪落之初遽興殄瘁之感其於卹典豈限彛章具
官司馬光超軼絕塵應期降命蹈履九德湛涵六經逮
事仁宗以論思獻納任言責翊我英祖以安危治亂鑒
古今粵惟先朝廷登近弼方事獻可而替否不肯枉尺
而直尋紬繹新書優游卒歲乃心無不在王室不起何
以慰蒼生顧惟眇躬肇稱堯祀雖未能求諸野而得傳
說亦庶幾選於衆而舉臯陶激濁揚清方甄明於流品
制法成治永振惠於黎元而慙遺之悲天不得於一老

惴慄之歎人皆輕於百身茲大享於合寢仍不預於小
斂師垣一品降之九原開國於溫用旌直德納棺以祔
式勸具僚念涕泗以無從想話言之猶在俯惟英爽歆
此寵靈可特贈溫國公

張績除宣德郎制

敕太學博士張績祖宗設賢良文學之科以網羅天下
之豪俊間得偉人爾繇是選而沈默恬淡安於冗散學
士鄧溫伯與東西省從官列上奏狀朕嘉乃冲靜特俾

遷秩益務敦茲將有試焉可特授宣德郎依舊太學博士

孫覺除吏部侍郎制

敕自國家還政文昌將以致治而天官四銓總覈人物
澄清流品未見其人除擬之間賢愚同滯以爾朝請郎
試給事中孫覺文學論議燭知本原諫省東臺久從踐
歷選掄之慎委寄益隆噫法之窒閼者更吏之不虔者
逐賕文弗作甄序有倫服我訓詞尚有大用可特授依

前官試吏部侍郎

曹旦知南平軍制

敕供備庫副使曹旦西南瀘夷諸種部族散處藂望谿谷之阻與魚鳥羣卉服而居畬田而食樂生惡死情無甚異軍摩邊戍備預不虞靜而緩之彼自馴擾往服吾訓以稱人知可特授依前官權知南平軍事

呂和卿知台州制

敕承議郎尚書金部員外郎呂和卿臨海雖小邦而有

民社之重朕豈輕之爾以仕優而學誠知戒夫墻面之
煩製錦之未易乎往欽用勵毋忽吾訓可依前官差權
知台州

陸佃禮部侍郎制

敕文昌貳卿位次八座各有典司咸用專達天官之選
目色實繁以爾朝奉郎試吏部侍郎陸佃方頒以先朝
一代大典續修筆削勢難兼綜春官宗伯事雖稀簡目力
可周而典章文物動闕國體益思明練以稱恩休可特

授依前官試禮部侍郎依舊充修實錄院修撰官

龍圖閣直學士朝請大夫知定州蔡延慶朝請

大夫試戶部尚書李常並磨勘轉朝議大夫

制

三考而議黜陟古今所同積日而叙勤勞貴賤無間矧
夫內與六官之長外總連帥之權均大計之盈虛司隣
邦之動靜歷年應格稽法當遷有司以言朕何敢後具
官李常奮由疎遠深自刻修財賦所存綱目具舉具官

蔡延慶名臣之後吏治有餘干城四方安靜不擾咸以
侍從之選而應股肱之良雖尺寸以遷未彰於異數而
命秩之寵差慰於久勞

朝奉郎孫覽除右司員外郎制

奉使北方治河而備邊任亦重矣以為未足以盡其才
也而寘之都司吾之所以責任爾者可見也夫分治六
官事無鉅細畢陳於前若網在綱振之則舉弛之則盡
廢爾昔既稱治辦矣勉既厥心以待來効

朝奉大夫田待問淮南提刑制

揚楚春旱秋水民艱於食漸起為盜遂使州縣犴獄充
滿朕憂之未始一日忘也間起爾於山陽守參領漕事
今又命爾按視刑辟徒以爾習其風俗知吏民所習苦
夫察貪暴謹追擾均有無督盜賊此荒政之急也勉勤
其職以稱朕意

朝散郎殿中侍御史林旦淮南運副制

淮甸之民荐罹饑饉乃者詔發倉廩發吳楚之漕以拯

其急猶以乏食流徙達於朕聽朕惟救荒之政行之略
盡惟得良使者因事施宜為若可賴爾由郎官以才任
御史習於楊楚之俗其為朕往視之均徭薄歛禁暴戢
姦無使斯人重被其困

東坡全集卷一百八

欽定四庫全書

東坡全集卷一百九

宋 蘇軾 撰

內制赦文三首

明堂赦文

元祐元年
九月六日

門下聖人之德無以加孝帝王之典莫大承天朕以眇
眇之身旒旒在疚永惟置器之重惕若臨淵之深承明
繼成思有以迪先王之烈紹志述事未足以慰天下之
心仰繫母慈總攬政體緝熙百度和樂四方賴帝貺臨

海寓寧又三垂之兵靡警萬邦之年屢豐庶幾大同光
嗣成美深惟六聖之制必躬三歲之祠維茲肇裡屬予
訪落喪有以權而從變祭無以卑而廢尊顧言總章古
重宗祀以教諸侯之孝以得萬國之心我享維天下武
式文王之典大孝嚴父孔子謂周公其人追維前猷嘗
講茲禮包舉儒術咨諏縉紳刺六經放逸之文斥衆言
淆亂之蔽嘉與四海靈承一天革顯慶之蕙尊隆永徽
之專配成於獨斷畀予冲人遵遺教於前著成法於後

涓選吉日袞輶上儀奉壘琳宮奠玉路寢神之弔矣燕
及皇天誰其配之既右烈考於時夙齋輅之駕被袞冕
之章備庶物之微追三牲之養靈游而風馬下孝奏而
日月光惕然履霜詎勝悽愴之意儼然出戶如聞歎息
之聲秩祜賚我思成侍臣助予惻楚既迄成於熙事敢
專饗於闕休宜布洪恩以暨諸夏

云

於戲漢庭祀帝

著於即阼之踰年唐室施仁固以御門之吉日蓋禮盛
者文縟澤大者流長尚賴文武之英屏翰之雋協恭致

治以輔邦家

西京奉安神宗皇帝御容禮畢西京德音赦文

元祐二年十月十四日

門下朕以寡昧仰繼聖神顧瞻山林未忘弓劍之慕益
廣宗廟以奉衣冠之游祇遣輔臣往嚴像設敞鳳臺之
仙宇粲龜洛之仁祠晬表一臨陪京增重山川改色方
貢祥而効珍父老縱觀或太息而流涕宜施雷雨之澤
以答神人之心云云於戲好生育物既推文母之慈崇

德措刑終成神考之志資爾有衆宜體朕懷

德音赦文

元祐三年六月

門下朕以眇躬獲御大器仰聖后之慈訓荷先烈之永圖四載于茲涉道尚淺凜然祇惕若履淵冰思所以慰安人心奉若天道常慮一夫之失所以傷萬物之太和蠲苛去煩夙夜願治迺自去冬連月降雪異常今春已來久陰不霽農民失職商賈不通比屋之間凍餒彌甚常寒之罰咎在朕躬惟日兢兢以圖消復潔精致禱神

眷未孚克已自持協氣無應切慮四方獄犴冤滯尚多
工役煩興人咨胥怨鬱成繆盭之變以干陰陽之和宜
均渙恩以召善氣云於戲遇災祗戒聿修信順之誠
正事布和庶獲天人之助咨爾中外咸體朕懷

內制詔敕九十七首

集官詳議親祠北郊詔

敕門下國家郊廟時祀祖宗以來命官攝事惟三歲一
親郊則先饗清廟冬至合祭天地于圓丘元豐間有司

援周制以合祭不應古義先帝乃詔定親祠北郊之禮
未及施行是歲郊不設皇地祇位而宗廟之饗率如舊
制朕以寡昧嗣承六聖休德鴻緒今茲禋禮奠幣上帝
裸鬯廟室而地祇天神久未親祀矧朕方修郊見天地
之始其冬至日南郊宜依熙寧十年故事設皇地祇位
以答並貺之報仍令有司擇日遣官奏告施行厥後躬
行方澤之祀則修元豐六年五月之制俟郊祀畢依前
降指揮集官詳議親祠北郊事及郊祀之歲廟饗典禮

聞奏故茲詔示想宜知悉

太皇太后賜門下手詔

元祐三年七月八日

敕門下皇帝嗣位于茲四年華夷來同天地並應而皇太妃以恭儉之德鞠育之恩雖典冊以時奉行而情文疑有未稱皇帝以祖考之奉尊無二上而吾惟春秋之義母以子貴其推天下之養以慰人子之心宜下禮部太常寺討尋如於典故有褒崇未盡事件令子細開具

聞奏

太皇太后賜門下手詔

元祐三年閏十月十四日

敕門下官冗之患所從來尚矣流弊之極實萃于今以
闕計員至相倍蓰上有久間失職之吏則下有受害無
告之民故命大臣考求其本苟非裁損入流之數無以
澄清取士之源吾今自以眇身率先天下永惟臨御之
始嘗敕有司蔭補私親舊無定限自惟薄德敢配前人
已詔家庭之恩止從母后之比今當又損以示必行夫
以先帝顧託之深天下責望之重苟有利於社稷吾無

愛於髮膚矧此恩私實同毫末忠義之士當識此誠各
忘內顧之心共成節約之制今後每遇聖節大禮生辰
合得親屬恩澤並四分減一皇太后皇太妃准此

趙州賜大遼賀興龍節大使茶藥詔

元祐元年
十月六日

敕卿肅將慶幣遠涉川途風埃浩然徒馭勤止宜加寵
錫以示眷懷

趙州賜大遼賀興龍節副使茶藥詔

元祐元年
十月六日

敕卿將命夙興犯寒遠涉駕言未息軫念殊深特致恩

頒以嘉勤瘁

賜皇叔祖建雄軍節度觀察留後同知太宗正

事宗景上表辭恩命不允詔

元祐元年十月九日

敕宗景朕初執珪幣祇見上帝嘉與百辟徵福文考大
賚四海始于親賢皆神之休義不當避國有常典爾無
固辭

賜皇叔祖宗景上表辭恩命不許詔

元祐元年十月九日

敕宗景覽所上表辭免恩命事具悉國家有大祭祀必

均慶賞邦甸侯衛輝炮翟閭無有遠邇畢蒙惠澤矧我
懿親實維顯相祇率舊典毋煩固辭

賜新除檢校太保依前河西軍節度使阿里庫

加恩制告詔

元祐元年十月十五日

敕阿里庫朕涓選靈辰奉承宗祀肆均介福徧暨多方
卿世撫侯封夙虔朝命特加寵渥用獎忠嘉

太皇太后賜故夏國主嗣子乾順詔

元祐元年十一月十日

六日

惟我列聖眷爾有邦非徒極其寵榮蓋亦同其憂患念爾哀疚惻然顧懷臨遣行人往喻至意且致奠賻之禮以為存沒之光

趙州賜大遼賀正旦副使茶藥詔

元祐元年十月十九日

敕卿抗旌出境夙駕在塗眷言跋涉之勞宜適興居之節式頒良劑以輔至和

趙州賜大使茶藥詔

元祐元年十月十九日

敕卿遠飭使軺講修隣好蒙犯風霧跋履山川宜頒錫

於珍芳庶輔安於寢食

趙州賜大遼國賀太皇太后正旦大使茶藥詔

元祐元年十月十九日

敕卿恭講隣歡遠勤軫馭言念驅馳之久適丁寒沍之辰宜錫珍良式昭眷寵

趙州賜副使茶藥詔

元祐元年十月十九日

敕卿遠持使節來慶春朝方此沍寒良勤啓處宜示眷懷之異式頒劑和之良

賜鎮江軍節度使檢校太傅開府儀同三司上

柱國康國公判大名府韓絳上表乞致仕不

許詔

元祐元年十月二十日

敕韓絳覽所上表陳乞致仕事具悉卿四世元老國之
長城端笏垂紳不動聲氣風采所及自然折衝軒冕丘
園其實何異矧今艱難之際自有氷淵之虞黃髮在廷
未敢言病豈宜獨善遽欲即安尚分北顧之憂勿起退
歸之念強食自輔體我至懷

賜韓絳上表乞致仕不允詔

元祐元年十月二十日

敕韓絳省所上表陳乞致仕事具悉功成身退人臣之常壽考康強有不得謝卿出入將相垂三十年豈一小郡尚勤元老徒得君重卧護一方使吏民瞻師尹之儀刑蠻夷識漢相之風采丘園之請朕未欲聞其省思慮時寢食親近藥餌以副中外之望

賜金紫光祿大夫守尚書右僕射兼中書侍郎

呂公著生日詔

元祐元年十月二十七日

敕公著卿將相三世輔翼兩朝方斯干獻夢之辰有既
醉太平之福宜膺慶賚永錫壽康

賜新除依前中大夫守中書侍郎呂大防辭恩

命不允詔

元祐元年十一月四日

敕大防卿敦大直方任重道遠擢貳西省蔽自朕心雖
與聞政事為日未久而歷試中外勤勞百為蓋有年矣
德位惟允人無間言亟服新命毋煩朕訓

賜新除御史大夫傅堯俞辭免恩命不允詔

元祐

元年十一月六日

敕堯俞詩云剛亦不吐柔亦不茹朕以卿有樊仲之風
是以擢卿為中執法才華之歎古今共之豈以小嫌而
廢大任與其拘文以自疑不若直已而行義亟服乃事
無煩固辭

賜正議大夫同知樞密院事安燾乞退不允詔

元祐元年十一月十三日

敕安燾卿才當其位義不辭勞內之樞機之謀外之疆

場之議既當身任其責難以家事為詞而況並奉君親
兩全忠孝進無不得退以何名卿之所求固非矯激朕
之不許亦豈空文亟還厥官無煩朕命

賜韓絳上第二表乞致仕不允詔

元祐元年十一月十四日

敕韓絳朕以眇躬求助諸老皆以艱難之際不辭中外
之勞胡為累章確守歸意豈朕不善西伯之養而無人
子思之側乎三復喟然未喻厥指朕意不易卿其少安

賜韓絳上第三表乞致仕不許斷來章詔

元祐元年

十一月
十四日

敕韓絳君臣之義憂樂同之苟皆懷歸誰任其事卿之
高識雅度輕軒冕而樂丘園天下所共知也獨不念先
帝託付之重乎勉徇大義勿復以言

賜韓絳上第三表乞致仕不允斷來章詔

敕韓絳功成身退人臣之常禮至於非常之遇則必有
無窮之報朕待卿於形器之表而卿自處於繩墨之內
未為得也朕意不易卿無復辭

賜新除依前光祿大夫刑部尚書蘇頌辭恩命

不允詔

元祐元年十月十七日

敕蘇頌卿篤於仁心深於經術用心司寇期於無刑朕惟孝處之深三年不奪其志又推才難之故千里以待其來卿而不能誰當能者亟服乃事毋煩力辭

賜新除落致仕依前光祿大夫范鎮赴闕詔

元祐

元年十月二十日

敕范鎮夫有德君子以精神折衝譬之麟鳳能服猛鷙

朕虛懷前席以致諸老非敢必以事諉也苟得黃髮之
叟皤然在位則朝廷尊嚴奸冗消伏卿雖篤老乃心王
室母憚數舍之勞以赴中外之望

皇帝賜故夏國主嗣子乾順進奉賀正馬駝回

詔

元祐元年十二月二十四日

詔故夏國主嗣子乾順遠奉王正來歸時事惟此充庭
之實率皆任士之宜乃眷忠勤良深嘉歎

太皇太后賜故夏國主嗣子乾順進奉賀正馬

馳回詔

元祐元年十二月二十四日

詔故夏國主嗣子乾順述職春朝歸誠宰旅修此效牽之視致其乘服之良再閱來章式嘉忠節

賜觀文殿大學士知潁昌府韓縝上表辭免恩

命不允詔

元祐元年十二月二十五日

敕韓縝朕躬祀總章始行嚴配推廣帝親之澤覃及中外之臣惟我老成逮受顧命均此介福非不敢私國之故常毋煩謙避

賜鎮江軍節度使判大名府韓絳上第二表乞

致仕不許詔

元祐元年十二月二十九日

敕韓絳為國無強於得人用人莫先於求舊雖已挂冠而謝事尚俾安車而造朝豈有體力未衰蕃宣所寄亟圖自便遂欲言歸矧卿德望並隆神人所相焉有滿盈之懼夫何倚伏之虞尚體至懷少安厥位

賜觀文殿學士正議大夫知河南府孫固乞致

仕不許詔

元祐二年正月一日

敕孫固視國如家忠臣可以忘老視民如子君子可以忘勞卿被遇三朝出入二府德望並隆中外所服故起之詞館付以留籥使士有矜式民有依怙屬任之意豈輕也哉釋位謀安引年求避此踈遠小臣之事非所望於卿也尚體至意勿亟懷歸

賜觀文殿學士正議大夫知河南府孫固乞致

仕不允詔

元祐二年正月一日

敕孫固卿英祖所擢以遺神考乃養舊學用之西樞密

院位二年未見君子每惟圖任舊人之意當有越在外服之歎矧欲辭位而去遂安丘園哉三川重鎮務舉大體簿書期會則有司存優游卒歲可以忘老

賜觀文殿學士正議大夫知河南府孫固再乞

致仕不允詔

元祐二年正月二十五日

敕孫固廊廟之舊歷事三朝名德並隆如卿者有幾無故釋位其謂朝廷何卿既自為謀亦為乃后謀之勉遵前詔以慰中外之望

賜觀文殿學士正議大夫知河南府孫固再乞

致仕不允詔

元祐二年正月二十五日

敕孫固朕永懷三宗追用其人所以尊禮慰藉其意者
自以為無失矣而卿浩然懷歸若不可復留何哉勉徇
大義毋違朕志

賜新除樞密直學士知定州韓忠彥乞改一偏

州不允詔

元祐二年二月

敕忠彥朕嘗覽閱古之圖觀宗臣之文俯仰今昔有槩

於心會中山闕守差擇循良卿庶幾焉勉副朕意何以辭為

賜樞密直學士守兵部尚書王存乞知陳州不允詔

敕王存卿出入四朝更涉夷嶮金石之節終始惟一六卿之長所以倡九牧而厚風俗也豈以職事煩簡為輕重哉君子出處朝廷之大事而風雨寒暑膚理之微疾也姑安厥位以稱朕意

賜尚書左丞李清臣生日詔

元祐三年二月二十四日

敕清臣春之方中月復幾望篤生王國之彥蔚為廊廟之華神既聽於靖恭民亦宜於愷悌膺我慶賜永綏壽祺

賜朝散大夫試御史中丞傅堯俞乞外郡不允

詔

元祐二年三月十三日

敕堯俞負中外之望居得言之地朕方虛已樂聞嘉猷乃者水旱連歲民流未止賊盜將熾財力靡敝卿既欲

圖實效以酬恩朕亦將考所言以責實偃息藩郡豈所望哉

賜鎮江軍節度使充集禧觀使韓絳茶藥詔

元祐

二年
三月

敕韓絳春夏之交寒燠相沴起居之節調適為難眷予元臣久勞于外宜加存問且錫珍良勉蹈至和以符眷倚

賜保寧軍節度使馮京告敕茶藥詔

元祐二年
三月二十

一曰

敕馮京卿以篤老久勤外服留蔭之重擁髦而東蒙犯氛埃徒御良苦宜省思慮近藥物勉遵時令以副眷懷
賜鎮江軍節度使充集禧觀使韓絳赴闕詔

元祐

二年三月
二十七日

敕韓絳卿擢自祖宗輔翼先帝德望之重天下聳聞與其置之一方勞以民事不若歸安闕下式瞻儀刑請老閒居固非所望嘉猷入告夫豈不能遲卿言還及此初

夏

賜鎮江軍節度使充集禧觀使韓絳赴闕詔

元祐

二月三月
二十七日

敕韓絳為天下計則賢者常勞為人臣謀則老者當逸
今朝廷待卿之意酌處其中奉朝請於琳官所以系民
望釋負荷於留籥所以慰雅懷勉及清和亟還朝著

賜尚書刑部侍郎范百祿乞外任不允詔

元祐
二年

三月二
十九日

敕百祿成王命君陳商民在辟予曰辟爾惟勿辟予曰
宥爾惟勿宥惟厥中古之有司與天子相可否蓋如此
而況公卿之間議有異同而不盡其說哉例在中書與
在有司固宜審處歸于至當而卿遽欲以此去位非古
之道也其益修厥官以稱朕意

賜龍圖閣直學士新差知秦州呂公孺乞改授

宮觀小郡差遣不允詔

元祐二年
四月三日

敕公孺朕顧懷西方思得賢守使邊有備而民無擾以

卿耆老練達德宇淵靜泰又舊治吏士服習卧護諸將
無以易卿

賜彰化軍節度使開府儀同三司判大宗正事

宗晟上表乞還職事不允詔

元祐二年四月十五日

敕宗晟書云孝乎惟孝友于兄弟施於有政是亦為政
卿以膝下之養為宗人之法古之為政孰大於此而欲
以親辭職耶其益修厥官以稱吾意

賜彰化軍節度使開府儀同大司判大宗正事

宗晟上表乞還職事不允詔

元祐二年四月十五日

敕宗晟古者庶子之官設而邦國有倫所治雖簡而所寄甚重卿為宗室祭酒德度之美刑于中外朕方慶爪
璉之茂而欲觀麟趾之應益勵厥職無棄爾成

賜故夏國主嗣子乾順進奉謝恩馬馳回詔

詔故夏國主嗣子乾順臨弔之重以寵世臣思報之深
復承來价載閱充庭之實備形述職之心乃眷忠勤不
忘嘉歎

賜故夏國主嗣子乾順進奉謝恩馬駝回詔元祐

二年四月
十七日

詔故夏國主嗣子乾順向遣行人往賻襄事繼陳方物
來奉謝章惟忠可以附民惟禮可以定國勉終誠節以
副眷懷

賜新除尚書左丞劉摯辭免恩命不允詔

敕劉摯朕昔聞卿言今任以政已試之效見于事功廊
廟闕人以次遷用宜其右不宜其左能於昔不能於今

豈有是哉

賜新除中大夫守尚書右丞王存辭免恩命不

允詔

元祐二年五月二十六日

敕王存朕厯選百辟試之以事惇厚而文剛毅而和更涉變故守德不移無逾卿者夫享天下之利者任天下之患居天下之樂者同天下之憂朕非以是富貴卿也其何以辭

賜集禧觀使鎮江軍節度使開府儀同三司韓

絳乞致仕不允詔

元祐二年六月四日

敕韓絳向以宏才卧護北道凡斯民之利病蓋一方之安危朕方虛懷以待元老冀疾病之有間得雍容而造朝時聞嘉言以輔不逮告老之請殊非朕心

賜韓絳乞致仕不允詔

元祐二年六月四日

敕韓絳元老在位邦之榮華徒以精神折衝非以筋力為禮游神道館擁節家庭於卿圖告老之安而國有貪賢之美勉自輔養期於少留

賜新除試吏部侍郎范百祿辭免恩命不允詔

元祐二年六月十二日

敕百祿夫以天官之貳治夏卿之選簿書繁重條格紛
委苟非其人則士之失職而無告者多矣朕難其材不
以輕授卿有應務之敏而行之以勤有守官之亮而濟
以通往行其志何以辭為

賜新除吏部侍郎傅堯俞辭免恩命乞知陳州

不允詔

元祐二年六月十三日

敕堯俞連蹇三黜栖遲十年士無賢愚為國太息知珠
玉之在泥土麟鳳之在網羅朕所以拔卿於久廢之中
用卿於期年之內天下拭目欲觀所為而乃引微疾以
自言指便郡而求去豈獨於卿有報國未遂之歎亦將
使朕獲用賢不終之譏勉復舊曹以全大節

賜同知樞密院事范純仁生日詔

元祐二年六月十八日

敕純仁卿天資文武世濟勲勞載嘉誕日之臨豈獨私
門之喜宜膺慶賜以介壽期

賜新除知樞密院安燾辭免恩命不允詔

元祐二年

六月二十四日

敕安燾人才之難從古所歎圖任以舊為國之常卿以
瓌異之資荷艱難之寄懃勞靡懈望實愈隆雖云超陞
不改疇昔徒以任之既久則責之宜專知無不為乃所
望於卿者卑以自牧亦何補於國哉

賜朝議大夫試戶部尚書李常乞除沿邊一州

不允詔

元祐二年八月二十二日

敕李常在泮獻馘亦儒者之常挺劒疾鬪蓋孔門之事
雖然義有輕重禮有後先與其自請捍邊已癘疥之疾
曷若盡瘁事國幹心膂之憂苟推是心何往非報雖願
受長纓而往者卿之本心然自以尺蠶而鞭之吾有餘
力尚體此意姑安厥官

賜太師平章軍國重事文彥博宰相呂公著自

今後入朝凡有拜禮宜並特與免拜詔

元祐二年

八月二十日

敕彥博朕聞几杖以優賢著之典禮耄老無下拜書於
春秋魏太傅鍾繇以足疾乘車就坐自爾三公有疾以
為故事而唐司徒馬燧亦以老病自力對於延英詔使
毋拜今吾耆老大臣四朝之舊德隆而望重任大而憂
深者惟卿與公著而已

呂公著詔即改云
惟彥博與卿而已

方資其耆龜

之告豈責以筋力之禮今後入朝凡有拜禮宜並特免
卿其專有為之報畧無益之儀毋或固辭以稱朕意

賜新除兼侍讀依前光祿大夫吏部尚書蘇頌

辭免恩命不允詔

元祐二年八月二十七日

敕蘇頌朕惟左右正人之求甚難其選以為直諒多聞之益宜莫如卿方虛懷於至言豈曲從於遜避亟服乃事毋煩固辭

賜守司空開府儀同三司致仕韓絳乞受冊禮

畢隨班稱賀免赴詔

元祐二年八月二十七日

敕韓絳卿脫屣軒冕順神丘園不為絕俗之高愈篤愛君之意喜聞冊號請覲內廷在臣子之誠心卿為盡節

顧筋骸之末禮吾所未安

賜宰相呂公著乞罷免相位不允詔

元祐二年八月二十

八日

敕公著宰相之責綏靖四方羌人既俘士氣益振長轡
遠馭方資老謀卿不强起孰卒吾事近以二老之故削
亟拜之禮而彥博執謙不回朕既從其請矣卿起就位
復何疑哉

賜前兩府并待制已上知州初冬衣襖詔

元祐二年

九月
七日

敕元發歲將墜戶工告始裘宜頒在笥之珍以示維藩
之寵服之安燠體我眷懷

賜太師文彥博乞致仕不允詔

元祐二年
九月十日

敕彥博卿求退之意著於士民執謙之心信於天地勉
當委重之託初無懷祿之嫌大義苟安細故可畧朕命
不再卿其少安

賜太師文彥博乞致仕不許詔

敕彥博論道則忘年卿不可以年既高而為請稱德則
鄙力卿不可以力不足而為詞斷之於中義有不易豈
以屢請之故而為將成之功體君至懷以慰公議

賜龍圖閣直學士尚書工部侍郎蔡延慶乞知

應天府不允詔

元祐二年九月十六日

敕延慶入侍禁近出殿藩服已試之效藹然有聲今若
予工宜有餘力夫游刃肯綮尚不辭難退食委蛇豈當
告病膚理微疾行當自痊勉安厥官以稱朕意

賜尚書左丞劉摯生日詔

元祐二年九月二十二日

敕劉摯律協應鍾辰集析木實生俊輔休有令名應裁寵章以介眉壽

趙州賜大遼皇帝賀興龍節大使茶藥詔

元祐二年

九月二十七日

敕卿隣歡載講使節甚華永言郵傳之勤適此風霜之候宜加寵賚以示眷存

趙州賜大遼皇帝賀興龍節副使茶藥詔

元祐二年

九月二十七日

敕卿載馳遠道良苦祈寒豈無藥物之嘉以輔寢興之節宜膺寵錫尚體至懷

賜太師文彥博生日詔

元祐二年九月二十九日

敕彥博陽月載臨剛辰協吉篤生元老弼亮四朝允為廊廟之華豈獨閨門之慶往膺寵數永錫壽祺

賜資政殿學士大中大夫新知成都府王安禮

乞知陳穎等一郡不允詔

元祐二年十月一日

敕安禮朕惟西蜀地狹而賦重人懦而吏肆徭役新定
農民在官馭之無方將不勝弊惟朕左右信臣明而不
苛寬而有斷必能肅遏慢吏扶養小弱卿雖微疾強為
朕行時近藥石勉事道路稱朕意焉

汧路賜奉安神宗御容禮儀使呂大防銀合茶

藥詔

元祐二年
十月七日

敕大防於赫神考如日在天雖光明無所不臨而躔次
必有所舍肆予命爾祇奉此行禮既告成勤亦良至感

慕之外嘉歎不忘

賜資政殿學士大中大夫新差知成都府王安

禮銀合茶藥詔

元祐二年十月八日

敕安禮朕求治如不及用人惟恐失之矧余良臣擢自神考出入中外厥聲藹然朕豈欲其遠去哉特以全蜀之寄甚難其選知卿篤於忠義當不以遠近為意也勉事道路慎疾自愛往安吾民以稱朕意

趙州賜大遼賀太皇太后正旦大使茶詔

元祐二年

十月十七日

敕卿久勤輶傳遠犯風埃眷言行邁之勞良極軫懷之意往頒珍劑以輔至和

趙州賜大遼賀太皇太后正旦副使茶詔

元祐二年

十月十七日

敕卿久乘使傳來講鄰惟屬此沍寒尚懃行役往知問勞式示眷懷

趙州賜大遼賀皇帝正旦大使茶藥詔

元祐二年十月

十七日

敕卿遠慶春朝篤修隣好永惟使事之重遂忘行役之勞既極歎嘉宜申問勞

趙州賜大遼賀皇帝正旦副使茶藥詔

元祐二年十月

十七日

敕徂歲向晚修途苦寒方趨造於會朝未即安於舍館往加恩錫增重使華

賜宰相呂公著生日詔

元祐二年十月十八日

敕公著卿三世將相四朝耆老賚我良弼實惟茲辰茂膺維嶽之靈永錫如陵之壽宜頒寵數以示眷懷

賜新除龍圖閣直學士李之純辭恩命不允詔

元祐二年十一月四日

敕之純祖宗之文章與典謨訓誥並寶於世典領其事非有德君子雖積勞久次不以輕授蜀遠而人懦窮困抑塞至無所訴朕專欲以德安之故內閣之命非獨以寵卿抑將使蜀人知朕用卿蓋以德選也其深識此意

勿復固辭

賜太師文彥博乞致仕不許詔

元祐二年十二月二十五日

敕彥博卿自去歲以來數苦小疾尚能勉留以輔不逮
近者神明所相體力自康視聽不衰步趨加健乃欲求
去耶今御戎之策未有定議京東西河朔荐饑公私枵
然方與二三臣圖之卿未可以即安也

賜文彥博乞致仕不允詔

元祐二年十二月二十五日

敕彥博卿歷相三宗名聞四夷位極一品書考四十自

載籍以來未之聞也固當以國為家以天下為身以安社稷為悅而不當以居丘園為樂也朕方待卿而為政請老之言所未欲聞

賜外任臣寮進賀太皇太后受冊馬詔敕

元祐二年

十二月二十六日

敕禮以正名國之舊典載閱充庭之實式將戴后之心朕眷忠勤良深嘉歎

賜外任臣寮進奉賀皇太后皇太妃受冊馬詔

敕

元祐二年十二月二十六日

敕典冊告成宮闈之慶事君盡禮因物見誠乃眷忠勤
不忘嘉歎

賜保寧軍節度使知大名府馮京進奉賀端午

節馬詔

元祐二年十二月二十六日

敕馮京受鉞將壇剖符畿甸効充庭之駿足慶中火之
良辰乃眷勤誠不忘嘉歎

賜資政殿學士知鄧州韓維進奉謝恩馬詔

元祐

二年十二月
二十六日

敕韓維廟堂均逸遠不忘君駟駿在庭儀多於物載惟
忠蓋良極歎咨

賜檢校司空左武衛上將軍郭逵進奉謝恩馬

詔

元祐二年十二
月二十六日

敕郭逵惟卿耆老漸就退閒不忘戴主之誠遠效充庭
之駿載嘉忠蓋良極歎咨

賜中大夫守尚書右丞王存生日詔

元祐三年
正月四日

敕王存卿以宏才與聞大政誕日之慶豈惟閨庭寵錫
之隆庶延壽嘏

賜試戶部侍郎趙瞻陳乞便郡不允詔

元祐三年正月

十三日

敕趙瞻朕褒顯耆舊取其宿望養育俊乂待其成材庶
前後相繼朝不乏人則堂陛自隆國有所恃方今在廷
之士孰非華髮之良而卿以康強之年為遠引之計於
義未可益難曲從

賜皇伯祖宗晟辭免起復恩命不許詔

元祐三年二月

日十五

敕宗晟卿哀迫之至言不及文覽之惻然欲從所請而
宗子之衆才性各殊位不期驕祿不期侈非卿允蹈忠
信力行禮義以身先之蓋未易齊也少屈爾私以成吾
志不亦可乎

賜皇伯祖宗晟辭免起復恩命不允詔

元祐三年二月

日十五

敕宗晟卿以強起就位為未便安而朕以徇私忌公為未盡美書云孝乎惟孝友于兄弟施於有政是亦為政夫聖人以孝弟為從政而卿以從政為非孝非所聞也勉從朕命勿復固辭

賜皇伯祖宗晟辭免起復恩命不許詔

元祐三年二月

十五日

敕宗晟卿致孝罔極守禮不回以魯衛之親而行曾閔之事吾深欲成人之美遂卿之私願以宗臣治親有國

先務教以道藝時其冠昏獎察其賢能而訓誡其驕惰
非吾宗室之老孰當父兄之任其深明吾意往服厥官

賜皇伯祖宗晟辭免起復恩命不允詔

元祐三年二月

二十
二日

敕宗晟君子之於禮雖先王未之有可以義起而況漢
唐之舊故事具存如翟方進房喬之流皆以儒術致身
不免於釋哀而謀國近歲夏竦晁宗慤亦以近臣奪喪
君子不以為過今宗正之事止於治親譬猶父兄訓敕

子弟豈以哀麻之故而廢閨門之政乎卿其勿疑亟服
乃事

賜保寧軍節度使知大名府馮京進奉興龍節

并冬至正旦馬詔

元祐三年二月二十五日

敕馮京震夙之祥旅庭稱慶歲時之會因物効誠乃眷
元臣實勤典禮多儀克舉屢歎不忘

賜外任臣寮進奉謝恩馬詔敕

元祐三年二月二十六日

敕銜恩思報因物致誠效茲乘服之良示有驅馳之志

永言忠藎良極歎咨

賜外任臣寮進奉興龍節功德疏詔敕

元祐三年二月

二十
六日

敕誕彌之慶中外所同畢輸衛上之誠來獻後天之祝
永言忠藎良極歎嘉

賜新除守司空同平章軍國事呂公著辭免恩

命不允詔

元祐三年
四月六日

敕公著委重元老朕之本心歸安丘園卿之素志今於

二者酌處其中使卿獲居勞逸之間而朕不失仰成之託於義兩得夫復何辭

賜新除大中大夫守尚書左僕射兼門下侍郎

呂大防辭免恩命不允詔

元祐三年四月六日

敕大防端揆黃門之任虛之久矣以卿德望兼重才術有餘故授之不疑渙號已行僉言惟允務稱朕命何以辭為

賜新除大中大夫守尚書右僕射兼中書侍郎

范純仁辭免恩命不允詔

元祐三年四月六日

敕純仁國之安危寄於宰輔朕豈苟然而輕授也哉試之以事而不移斷之於心而不貳成命已出豈容復回往修厥官以稱朕意


賜觀文殿大學士光祿大夫知永興軍韓縝三

上表乞致仕不許斷來章詔

元祐三年四月七日

敕韓縝夫任天下之責者無自營之私蒙國士之知者有非常之報矧卿德望兼重體力猶強方資禦侮之壯

猷焉用引年之常禮宜安厥位毋復言歸



東坡全集卷一百九

欽定四庫全書

集部

東坡全集卷一百十一

詳校官庶吉士臣謝恭銘

檢討臣何思鈞覆勘

總校官進士臣朱鈐

校對官中書臣牛稔文

謄錄監生臣陳其道

欽定四庫全書

東坡全集卷一百十

宋 蘇軾 撰

內制詔敕五十二首

賜觀文殿大學士光祿大夫知永興軍韓縝三

上表陳乞致仕不允斷來章詔

元祐三年四月七日

敕韓縝朕體貌諸老儀刑四方假以方面之安畧其筋力之禮如卿屢請固無懷祿之嫌而朕固留宜有忘歸之意今中外無事民物小康顧恐安居之榮未逾坐嘯

之樂朕命不易卿其少安

賜新除大中大夫守尚書右僕射兼中書侍郎

范純仁再上劄子辭免恩命不允詔

元祐三年四月

七日

敕純仁卿奉事先帝義深受君與政西樞論不阿世昔
聞汲黯之不奪今有徐公之有常參以衆言蔽自朕志
右宰之任非卿而誰屢執謙詞殊非所望

賜新除依前中大夫守中書侍郎劉摯辭免恩

命不允詔

元祐三年四月七日

敕劉摯朝廷設三省建丞弼雖所治不同至於因時立政昭德塞違其實一也卿既任其事矣今以次遷無足辭者

賜新除依前中大夫守尚書左丞王存辭免恩

命不允詔

元祐三年四月七日

敕王存卿學足以經邦才足以應務更練愈久開益居多以積日而少遷顧僉言之咸允國之常典何以辭為

賜新除中大夫守尚書左丞胡宗愈辭免恩命

不允詔

元祐三年四月七日

敕宗愈卿昔在諫垣首開正論出入滋久操守不回雅望在人既非一日之積歷試而用亦自羣言之公往祇厥官毋替朕命

賜新除依前中散大夫充樞密直學士簽書樞

密院事趙瞻辭免恩命不允詔

元祐三年四月七日

敕趙瞻朕惟奉兵之地司命吾民矧羌戎叛服之無常

實邊鄙安危之未決豈以此柄輕授其人以卿望重縉紳學兼文武歷試而用衆言允諧往踐厥官勿違朕命

賜新除門下侍郎孫固辭恩命不允詔

元祐三年四月

八日

敕孫固朕惟三朝老臣義同休戚先帝舊學存者幾人意其風采之聳聞可使朝廷之增重矧卿德望素著寄任已隆昔冠西樞今貳東省衆以為允義無足辭

賜新除試御史中丞孫覺辭免恩命不允詔

元祐

三年四月八日

敕孫覺卿三居諫省皆以直聞蓋嘗遇事以建言志在
行義以達道擢為執法實允僉言以卿直諒多聞而朕
聞納不諱固無觀望難言之病豈有喪失名節之憂哉
載閱來章甚非所望

賜新除右光祿大夫依前知樞密院事安燾辭

恩命不允詔

元祐三年四月八日

敕安燾卿謀國之重歷年於茲紀綱修明中外寧輯夫

圖任共政所憂者大則久勞遷秩亦理之常雖固執於
撝謙恐難回於成命往服休寵以彰眷懷

賜新除中大夫守尚書右丞胡宗愈辭免恩命

不允詔

元祐三年
四月十日

敕宗愈卿更涉夷險踐馭中外出奉使指而民宜之入
治天官而吏畏之非獨能言者也書不云乎敷奏以言
明試以功朕得之矣卿其勿辭

賜新除依前中散大夫充樞密直學士簽書樞

密院事趙瞻辭免恩命不允詔

元祐三年四月十日

敕趙瞻朕之進人可謂難矣自非耆老久次惓惓無華則樞機之任不以輕授卿之自視何愧於斯祇服厥官思所以稱而已

賜新除翰林學士朝請大夫知制誥許將赴闕

詔

元祐三年四月十一日

敕許將卿敏而好學達於從政出殿方國則脩儒術以飾吏事入備顧問則酌民言以廣上聽待命北門號稱

內相雖於卿為舊物實當今之高選亟踐厥職佇聞嘉猷

賜新除司空同平章軍國事呂公著辭免冊禮

許詔

元祐三年四月十三日

敕公著多儀以隆輔弼國之彞典自損以信君父卿之美志再閱誠言之請益彰謙德之光勉徇所陳不忘嘉歎

賜正議大夫知樞密院事安燾辭免遷官恩命

允詔

元祐三年四月十五日

敕安燾卿國之雋輔位冠樞庭以時褒陞宜待功闕而能力辭寵命欲以身率羣臣使庶恥相先名器益重勉從來請以篤此風

賜新除中大夫守尚書右丞胡宗愈辭免恩命

不允詔

元祐三年四月十五日

敕宗愈朕之用卿蓋聽其言考其行事參之公議而斷自朕心可謂審矣而卿固辭不已朕甚惑之夫小人以

位為寵求之而不可得君子以寵為憂推之而莫能去
自古以然卿何疑哉

賜新除司空同平章軍國事呂公著辭免冊禮

允詔

元祐三年四月十五日

敕公著冊祝於廟惟周之典臨朝親拜亦漢之舊事大
則禮重禮重則樂備古之道也今卿遜避不居自處以
約勉從所乞以成其美

賜許將辭免恩命不允詔

元祐三年四月十八日

敕許將進以經術當告我以安危來自西南固知民之
利病渴聞讜論少副虛懷而乃退托無能力辭舊物既
非所望其可曲從

賜河西軍節度使西蕃邈川首領阿里庫進奉

回詔

元祐三年四月二十二日

敕阿里庫惟爾祖先世篤忠孝本與夏賊日尋干戈亦
惟恃我朝廷爵秩之隆用能保爾子孫黎民之衆肆朕
命爾嗣長乃師而承襲以來強首外擅爾弗能禁恣其

所為遂據逃城以犯王畧陰連夏賊約日盜邊朕慙屬
羌之無辜出偏師而問罪元惡俘獲餘黨散亡山後底
平河南綏服朕惟率首豪而捍疆場乃爾世功叛君父
而從仇讐豈其本意庶能改過未忍加兵果因物以貢
誠願洗心而効順爾既知悔朕復何求已指揮熙河路
更不出兵及除已招納到部族外住罷招納依舊許般
次往來買賣及上京進奉爾宜約束種類共保邊陲期
寵祿於有終知大恩之難再勿使來款復為虛言

賜新除依前朝散大夫守尚書吏部侍郎充龍

圖閣待制傳堯俞辭免恩命不允詔

元祐三年五月

二十三日

敕堯俞夙望所在舊疾既平及茲言旋慰我虛佇徒得
君重雖暫屈於淮陽雅意本朝寧久安於馮翊復求自
便殊戾所期往修厥官務稱朕命

賜守尚書右丞胡宗愈乞除閒慢差遣不允詔

元祐三年五月二十七日

敕宗愈朕開獎言路通來下情雖許風聞猶當核實豈以無根之語輕搖輔政之臣朕方馭衆以寬退人以禮加之美職付以大邦朕既無負於聽言卿亦何嫌而避位祇服乃事毋自為疑

賜尚書右僕射兼中書侍郎范純仁生日詔

元祐

三年六月九日

敕純仁卿河嶽之靈神明所相載更誕日永介壽祺體我眷懷受茲寵錫

賜正議大夫守門下侍郎孫固生日詔

元祐三年六月

二十三日

敕孫固卿圖任之舊縉紳所推難老之祥神人攸相載更良日益永壽祺申以寵章式隆眷遇

賜正議大夫知樞密院事安燾生日詔

元祐三年六月

二十三日

敕安燾桑弧告慶降哲輔於茲辰綵服拜嘉冠榮名於當代祗服朕命益壽乃親

賜龍圖閣學士河東路經畧使兼知太原府曾

布乞除一閒慢州郡不允詔

元祐三年七月二十一日

敕曾布將不久任難以責成謀不素定難以應猝卿屢
試劇郡所臨有聲而况二年於茲諸將所服事既即叙
人誰易卿夫擣虛攻瑕兵家常勢知難避整外國亦然
卿若有以待之彼將望而去矣勉卒乃事毋忘朕言

敕河西軍節度使西蕃邈川首領阿里庫進奉

回程詔

元祐三年八月三日

敕阿里庫卿屢款塞垣願終臣節爰因貢篚益著誠心
再省忠勤良深嘉嘆

賜皇叔改封徐王顥上表辭免冊禮允詔

元祐三年

八月二十日

敕顥卿大雅不羣自得詩書之富為善最樂不知軒冕
之榮既殷文邦宜膺盛禮而抑損之志逡巡不居雖莫
稱朕所以極褒崇之心而將使卿庶幾獲謙沖之福勉
從其意嘉歎不忘

賜皇叔改封徐王顥上表辭免冊禮許詔

元祐三年

八月二十日

敕顥錫山土田以昭令德備物典冊蓋有常儀而卿深懼滿盈過形抑畏一謙四益當克永年三命滋恭固將有後曲成美志以勸事君

賜知渭州劉昌祚進奉龍節銀詔

元祐三年十一月六日

日

敕昌祚卿禦侮邊庭馳神魏闕會嘉辰之獻壽納貢篚

以效珍載省忠勤不忘褒歎

賜皇伯祖宗晟辭免起復恩命不許詔

元祐三年十二月

日 月 五

敕宗晟夫要經服事出於孔門墨衰從政見於魯史永
惟狗國忘家之義非有食稻衣錦之嫌若非使卿居之
而安則吾豈敢強所不欲勉從前詔往服厥官

賜皇伯祖宗晟辭免起復恩命不允詔

元祐三年十二月

日 月 二

敕宗晟卿德爵與齒皆天下達尊服屬之隆為宗室祭
酒任獨高於三世報宜異於常人故奪情非以私卿而
服事所以徇國義無所愧何以辭為

賜正議大夫知鄧州蔡確乞量移弟碩允詔祐

三年十二
月九日

敕蔡確以義責備春秋有失教之譏以情內恕詩人有
將母之念碩之得罪事在有司難以貴近之親而廢朝
廷之典及觀來請有繫予心重違兄弟急難之詞以傷

人子奉養之意

賜知渭州劉昌祚進奉謝恩并賜月俸公使及

賀端午節馬詔

元祐三年十二月二十四日

敕昌祚卿執德宏毅秉心恪恭拜新渥於公朝謹舊儀於令節抗章來上因物見誠再省忠勤良深嘉嘆

賜端明殿學士銀青光祿大夫致仕范鎮獎諭

詔

元祐三年閏十二月二日

敕范鎮朕惟春秋之後禮樂先亡秦漢以來韶武僅在

散樂工於河海之上往而不還聘先生於齊魯之間有
莫能致魏晉以下曹鄴無譏豈惟鄭衛之音已雜華夏
之器間有作者猶有典刑然銖黍之一差或宮商之易
位惟我四朝之老獨知五降之非審聲知音以律生尺
覽詩書之來上閱冀虞之在廷君臣同觀父老太息方
詔學士大夫論其法工師有司考其聲上追先帝移風
易俗之心下慰老臣愛君憂國之志究觀所作嘉歎不
忘

賜朝散大夫守尚書吏部侍郎充龍圖閣待制

傅堯俞乞外郡不允詔

元祐三年閏十二月十四日

敕堯俞卿望重本朝進由公議方卿大夫有為之際亦士君子難得之時而卿出領郡章入佐治典席未暖而輒去政何時而報成小疾行瘳姑安厥位

賜保寧軍節度使知大名府馮京進奉賀興龍

馬一十匹并冬節馬二匹詔

元祐三年閏十二月十八日

敕馮京卿坐鎮全魏隱若長城遠馳頌禱之心來効驂

駢之貢眷言忠薰良極嘉歎

賜泰寧軍節度觀察留後知相州李珣進奉賀

冬馬一匹詔

元祐三年閏十月十八日

敕李珣卿宣化近邦馳神北闕屬茲陽月之吉遠效王
閑之良言念忠勤不忘嘉歎

賜中大夫守尚書左丞王存生日詔

元祐四年正月四日

敕王存在易之泰與物皆春於時良臣生我王國宜膺
寵賚以介壽祺

賜龍圖閣直學士正議大夫權知開封府呂公

著上表陳乞致仕不允詔

元祐四年正月五日

敕公著朕雞鳴而起志於求助鮑背之老未敢即安矧卿體力不衰髮齒猶壯遽有引年之講殊乖圖篤之心宜安厥心以稱朕意

賜呂公著上表陳乞致仕不允詔

敕呂公著卿將相三世凜乎正始之風出入四朝蔚然難老之狀浩穰之治談笑而成方觀報政之能遽有歸

休之請公議未可卿其少安

賜濟陽郡王曹佺在朝假將百日特與寬假將

理詔

元祐四年正月十二日

敕曹佺卿賢戚莫二德齒並隆眷言朝請之勤思見儀刑之老謝病既久軫念良深推予賜告之恩期於勿藥之喜

賜光祿大夫守吏部尚書兼侍讀蘇頌上表乞

致仕不允詔

元祐四年正月十三日

敕蘇頌吾聞有志之士以身殉道而遺名有道之君使人樂用而忘老今卿不安其位豈吾有愧於古哉夫難進之士年僅及而輒退則已試之才吾莫得而盡用矣激揚多士方資崔毛之德講誦舊聞未卒楮馬之業事非小補卿其少安

賜蘇頌上表陳乞致仕不允詔

敕蘇頌卿歷事四朝允有一德徒論徐公之奢儉莫見子文之愠喜朕既寤寐哲士體貌元臣方貴德齒之達

尊豈求筋力之常禮矧卿方膺難老之錫宜勵益壯之心惜日有為古人所重引年求去公議未安勉為朕留
以慰人望

賜光祿大夫守吏部尚書兼侍讀蘇頌上第二表

陳乞致仕不允詔

元祐四年
二月二日

敕蘇頌夫天以多士寧王國而祖宗以成德遺後人方
使壽考康彊以究其用而朕乃以引年而聽其去可乎
矧卿鈐綜之精談笑而辦勉思職事以稱朕心

賜蘇頌上第二表請乞致仕不許詔

敕蘇頌天官之任老成所宜坐執銓衡有山公晚年之故事簿書煩雜獨蕭俛一時之偏詞卿其總攬綱條濶畧苛細委蛇退食以慰士心

新除權禮部尚書梁燾辭免恩命不允詔

元祐四年

二月三日

敕梁燾卿出處以義進退以禮昔請補外朕不得已而聽其去今茲選用衆以為宜而恨其晚而卿又固辭豈

朕所望成命不易其速造朝

賜宣徽南院使充太一宮使馮京乞依職任官

例祇赴六參不允詔

元祐四年六月十四日

敕馮京朕以卿耆老厚德重煩以庶事而卿篤恭盡禮自同於有司既朝朔望尚復勤請雖抑抑自警知卿有衛武之風而僕僕亟拜非朕待子思之意宜遵前命以副眷懷

賜右正議大夫守尚書左僕射呂大防生日詔

元祐四年六月十五日

敕大防股肱之良與國為重家庭之慶亦朕所同適斯
干獻夢之辰均既醉太平之福膺予寵錫介爾壽祺

賜翰林學士中大夫兼侍讀趙彥若辭免國史

脩撰不允詔

元祐四年六月二十三日

敕彥若卿學世其家宜居載筆之地官宿其業已奏殺
青之書自託不能殊非所望祇膺成命毋復固辭

賜河東節度使太師開府儀同三司太原尹致

任文彥博溫錫沁馬詔

元祐四年七月二日

敕彥博惟我宗臣名震夷落狼心馱舌知獻厥誠朕以張奐拒羌之獻不如旅獒昭德之致已敕邊吏荅賜所直其馬今以賜卿至可領也

賜夏國主進奉賀坤成節回詔

元祐四年七月二十二日

敕節紀誕彌慶均臨照眷守邦之雖遠亦執贄以來同嘉與朝臣咸稱壽聳載惟忠恪宜有寵頒

賜皇伯祖宗晟辭免恩命起復允終喪制詔

敕宗晟朕寤寐雋賢燮和中外眷言釋位之久實有乏才之憂而三年未終五詔不起與其貪明哲之美以緝熙庶工不若執孝弟之純以風勵宗子俛從誠守良極歎咨

賜皇伯祖宗晟辭免恩命起復允終喪制詔

敕宗晟夫哀麻之哀達於上下損益之變權以重輕雖事君均於事親而奪志難於奪節俛聽終喪之守以成致孝之全言念篤誠實增屢歎

內制勅書三十三首

賜南平王李乾德歷日敕書

元祐元年十月八日

敕乾德眷彼海隅被予聲教宜有王正之賜以為農事之祥勤卹遠民以開嗣歲

賜新除依前交趾郡王李乾德加恩制誥敕書

元祐元年十

月十五日

敕乾德朕躬執珪幣大饗帝親盼布湛恩徧暨諸夏卿世綏侯服欽順朝廷宜錫徽章以昭異數

賜外任臣寮歷日詔敕書

元祐元年十月二十八日

敕韓絳朕申命日官逆推嗣歲眷予共理頒此成書勉
劭農功毋違時令

賜侍衛親軍馬軍都虞侯劉昌祚進奉賀明堂

禮畢馬敕書

元祐元年十一月二十日

敕劉昌祚大事告成多方同慶汝以分符之重特脩效
馬之儀載念勤誠不忘嘉歎

賜外任臣寮進奉興龍節馬詔敕書

元祐二年四月十三

日

敕韓鎮誕彌之慶遠邇攸同眷惟外服之良來效右牽
之禮言念誠恪不忘歎嘉

賜溪洞蠻人彭允宗等進奉端午布敕書

元祐二年

三月
十日

敕彭允宗等汝旌居裔壤心慕華風來脩任土之儀遠
效充庭之實載惟懃惓良用歎嘉

賜權陝府西路轉運判官孫路銀絹獎諭敕書

元祐二年六月二十八日
為築蘭州西荆堡成下同

敕孫路宣力計臺悉心邊政相視衿要繕完保障訖用
有成不愆於素使虜無可乘之便民有足恃之安乃眷
忠勤不忘嘉歎

賜知蘭州王文郁銀絹獎諭敕書

元祐二年六月二十八日

敕王文郁汝以禦侮之才當專城之寄百堵皆作三月
而成非威服民夷身先士卒則安能以一時之後成無
窮之利達於朕聽良用歎嘉

賜新除依前靜海軍節度使進封南平王李乾

德制誥勅書

元祐二年七月八日

敕朕子養兆姓囊括四荒譬之於天豈吝膏澤卿守藩
滋久事上益虔高爵隆名極其榮顯庶緣大寵以服民
心其思盡忠以稱恩禮

賜外任臣寮進奉坤成節銀敕書

元祐二年七月二十八日

敕劉昌祚汝承流外服雅意奉朝爰因載誕之辰遠致
同寅之禮眷惟忠藎良極歎嘉

賜西南羅藩進奉敕書

元祐二年九月三日

敕汝世為要服時款塞垣志慕華風來脩職貢載惟忠恪良用歎咨

賜諸路知州職司等并總管鈐轄至使臣初冬衣襖敕書

敕馮潔已王事靡盬日月其除屬霜露之戒寒待衣裘而卒歲宜加寵錫以示眷懷

賜諸路蕃官并溪洞蠻人初冬衣襖敕書

敕暗種職在捍邊志常面內屬此嚴凝之候宜均輕煖之恩服我寵頒益思忠報

賜諸路屯駐駐泊就糧本城諸負寮等初冬衣襖都敕

敕汝等久勤外服屬戒祈寒爰念捍城之勞普均挾纊之惠

賜外任臣寮等進奉坤成節功德䟽詔敕書

元祐

二年九月
二十四日

敕馮京職雖在外忠不忘君集勝妙之良因致壽康之
善禱眷言誠盡良極歎嘉

賜朝奉郎通判梓州趙君奐進奉坤成節無量

壽佛敕書

元祐二年九月二十四日

敕趙君奐相好妙嚴衷誠傾盡汝期乃后享無量之年
吾欲斯民同極樂之世永言忠愛良用歎咨

汧路賜奉安神宗御容押班馮宗道并內臣等

銀合茶藥敕書

元祐二年十月七日

敕馮宗道逮事有年追遠不懈屬祠官之告具驂日馭以遄征往復之間忠勞亦至特加存問尚體至懷

賜五臺山十寺僧正省竒等進奉興龍節功德

疏等獎諭勅書

元祐二年十一月一日

敕省竒等清涼之域僊聖所游爰因彌月之辰來獻後天之祝永言懃至良極嘆咨

賜外任臣寮歷日勅書

元祐二年十二月四日

勅韓鎮朕肇修人紀祗畏天明欽若舊章式頒新歷凡

我承流之寄共成平秩之功

賜于闐國黑汗王進奉登位敕書

元祐二年十月十一日

敕卿守藩西極慕義中華遠聞踐阼之新來致梯山之貢眷言忠恪良用歎咨

賜于闐國黑汗王進奉示諭敕書

元祐二年十月十一日

敕卿遠馳信使來效貢琛載詳重譯之言深亮勤王之意益隆哀賜以荅忠誠

賜外任臣寮進奉興龍節馬敕書

元祐二年十月二十四日

日

敕劉永年汝職在蕃宣義均休戚旅庭稱慶因物見誠
乃眷忠勤不忘嘉歎

賜溪洞彭儒武等進奉興龍節溪布敕書

元祐二年

十二月二十八日

敕彭儒武汝世能保境志在觀光遠修任土之宜來備
充庭之實載惟忠恪良極歎嘉

賜保州團練使潞州總管王保進奉總闕并到

任馬敕書

元祐二年正月七日

敕王寶汝以選掄出分憂寄來效充庭之駿以將衛上之誠再省忠勤良深嘉歎

賜知乾寧軍內殿承制張赴獎諭敕書

元祐二年四月

十八日

敕張赴橫流之災所在蒙害惟吏得其人則公私賴之使者列上有司不以時聞歲月既遠予猶汝嘉故茲獎諭想宜知悉

賜于闐國黑汗王進奉示諭敕書

元祐三年
五月一日

敕卿恪居蕃守申遣使車來款塞垣恭修壤貢忠誠
遠達褒歎良深

賜于闐國黑汗王進奉勅書

敕卿守土西極馳誠中華璧馬充庭尚識漢儀之舊織
皮在筐聊觀禹貢之餘載省忠勤不忘嘉歎

賜于闐國黑汗王男被令帝英進奉敕書

敕汝世敦忠厚志慕聲明遠附奏函亦馳貢筐載惟恭

順良極歎咨

賜五臺山十寺僧正省奇已下獎諭敕書

元祐三年

六月十八日

敕清涼之峯先聖所宅爰脩淨供以慶誕辰再省恭勤
不忘嘉歎

示諭武泰軍官吏軍人僧道百姓等勅書

元祐三年

八月十八日

勅朕以苗授賦材勇嚴馭衆整暇擢為宿衛之長寵以

節旄之榮惟爾邦人當諭朕意

賜殿前都虞侯寧州團練使知熙州劉舜卿進

奉賀冬馬勅書

元祐三年閏十月十八日

勅劉舜卿職在分憂忠存衛上屬此泰正之旦遠輸冀
產之良再省忠勤不忘嘉歎

賜外任臣寮進奉興龍節馬勅書

元祐三年閏十二月十八日

日

敕劉舜卿汝忠於衛上遠不忘君爰因彌月之晨來效

充庭之禮眷言勤篤良極嘉歎

賜西南蕃莫世忍等進奉敕書

元祐四年正月二十一日

敕莫世忍汝守土遐陬歸誠北闕梯山修貢款塞觀光
言念忠勤至於嘉歎

賜五臺山十寺僧正省竒等獎諭敕書

六月二十五日

下院

敕異景靈光久聞示化寶祠淨供爰慶設彌念此恭勤
至於嘉歎

東坡全集卷一百十